



Rabu, 22 Desember 2021
Ogen: Jesaya 7:14-16



Reh Me Immanuel



Minggu-minggu Advent ope Natal eme minggu si mabai kita nggeluh nikapken pusuh segelah kita ersikap sabap reh me Immanuel. Minggu-minggu enda jadi sada bagin si mengharusken kita guna mpekena-kena ukur, mpekena-kena lagu langkah. Enda me pengajuk man banta i bas minggu-minggu Adven enda. Nggo nge kita ersikap nandangi anak Dibata siateNa reh e? Kerehen Immanuel e mabai kesangapen pagin man manusia si tek man baNa. Erpalasken kitab Jesaya 7 enda, enda me sada momo mbelin si ipeseh man banta kerina erkelangken nabi Jesaya guna kerehen Immanuel e. Nggo nge seh momo e man bandu? Kai dage si banci ibahanndu adi nggo seh momo e man bandu? Cuba ukurkenndu lebe. Nggo nge lit persiapenndu? Enda me jadi sada tugas man banta kerina i bas wari enda si ngorati kerna renungen enda. Nabi Jesaya mereken sada persiapen man banta kerina gelah kita banci makeken geluhta erguna i bas ngalo-ngalo kerehenNa e. Sada tahun enda nggo si dalani alu erbage-bage nanam, kerina si mehuli, kerina si la payo, kerina si bujur seh ku si la bujur nggo si bentasi kerina e. Genduari, mari sifokusken geluhta guna namaken ingan si mejilena ku anak si kentisik nari tubuh. Ingan si mejilena e nggo arus si sikapken genduari nari, eme mbersihkan pusuh ras nggejapken pemere Dibata si kentisik nari reh.

Kerehen Immanuel e jadi sada pembebasen man banta kerina manusia si tertaban alu dosa sedakah kita nggeluh i doni enda. Bagi lagu bas KEE 409 nina : "*Rehlah kam o Immanuel, mulahi kami Israel si tertaban labuh ras ndele nimai anak Dibata e..*" Emaka ersikap kita, pekena geluhta, pekena jabuta segelah ngasup kita ngalo-ngalo anak e alu keriahen ukur ras pusuh si dame. I bas nggejapken pusuh si dame e, teklah kita anak Dibata e nggo dat ingan si meganjangna bas kegeluhenta. Mari si pekena dengen si pesikap geluhta i bas kerehen Immanuel.

 *Ersikaplah reh me Immanuel e*